

氏族典第四百二十八卷

趙姓部列傳二

晉 趙至

按晉書趙至傳至字景真代郡人也寓居洛陽詣師受業聞父耕叱牛聲投書而泣師怪問之至曰我小未能榮養使老父不免勤苦師甚異之年十四遇嵇康十六游鄴復與康相遇隨康還山陽改名淩字允元及康卒詣魏興見太守張嗣宗甚被優遇嗣宗遷江夏相隨到涪川欲因入吳而嗣宗卒乃向遼西而占戶焉至有縱橫才氣遼西舉郡計吏到洛與父相遇時母已亡父欲令其宦立弗之告仍戒以不歸至乃還遼西幽州三辟部從事斷九獄見稱精審太康中以良吏赴洛方知母亡初至自恥士伍欲以宦學立名期於榮養既而其志不就號憤慟哭嘔血而卒

趙誘

按晉書趙誘傳誘字元孫淮南人也世以將顯州辟主簿值刺史郗隆爲其下所害誘還家杜門不出王敦以爲叅軍與甘卓周訪共討華軼破之又擊杜弢滅之累功賜爵平阿縣侯代陶侃爲武昌

太守時杜曾迎第五猗於荊州作亂敦遣誘與朱軌共距之戰沒諡曰敬子龔與誘俱死

趙引

按晉書趙誘傳誘子引字伯舒王敦使周訪擊杜曾引請從行多梟首級王導引爲從事中郎南頓王宗反引殺宗於是王導庾亮並倚仗之轉冠軍將軍遷西豫州刺史卒於官

趙元

按萬姓統譜晉師伐秦秦將姚洸時鎮洛陽洸部將趙元說洸曰寇逼已深百姓駭懼衆寡勢殊難以應敵宜攝諸戍兵士固守金墉以待京師之援時洸司馬姚禹潛通於檀道濟固勸洸出戰洸從之泣謂洸曰元受三帝重恩所守止死耳但明公不用忠臣之言爲奸孽所誤後必悔之會陽城及成皐滎陽武牢諸城悉降元死於陣

趙整

按萬姓統譜整洛陽人苻秦時爲散騎常侍常盡忠匡諫時秦主堅頗好酒色整常爲詩上之曰昔聞孟津河千里有一曲此水本自清是誰使令濁堅正色曰朕之過也

趙遷

按魏書趙逸傳逸伯父遷姚萇尙書左僕射卒於長安

宋 趙倫之

按宋書趙倫之傳倫之字幼成下邳僮人也武穆皇后之弟幼孤貧事母以孝聞武帝起兵累遷雍州刺史及受命以功封霄城縣侯安北將軍鎮襄陽少帝卽位徵拜護軍元嘉三年拜鎮軍將軍尋遷左光祿大夫五年卒子伯符嗣

趙伯符

按宋書趙倫之傳倫之子伯符字潤遠少好弓馬倫之在襄陽伯符爲竟陵太守時竟陵蠻屢爲寇伯符悉破之由是有將帥之稱文帝卽位累遷徐兗二州刺史爲政苛暴吏人畏之若豺虎然而寇盜遠竄無敢犯境元嘉十八年徵爲領軍將軍二十一年轉豫州刺史明年爲護軍將軍子倩尙文帝第四女海鹽公主始興王浚與公主私通事聞有詔離婚伯符慙懼發病卒諡曰肅

南齊 趙僧巖

按尙友錄僧巖北海人寥廓無常人不能測與劉善明友善明爲青州欲舉爲秀才大驚拂衣而去後忽爲沙門栖遲山谷嘗以一壺自隨一旦謂弟子曰吾今夕當死壺中至夜而亡

梁 趙伯超

按萬姓統譜伯超嘉興人太清二年吳郡信義俱爲侯景所陷餘郡縣皆望風披靡伯超守錢塘其城堅不可拔

陳 趙知禮

按陳書趙知禮傳知禮字齊旦天水隴西人也父孝穆梁侯官令知禮涉獵文史善隸書高祖引爲記室參軍侯景平封始平縣子高祖爲司空以爲從事中郎高祖入輔遷給事黃門侍郎高祖受命遷通直散騎常侍尋遷散騎常侍守太府卿天嘉元年進爵爲伯王琳平授明威將軍吳州刺史知禮沈靜有謀謨每軍國大事世祖輒令璽書問之秩滿爲明威將軍太子右衛率遷右衛將軍六年卒諡曰忠子允恭嗣

北魏 趙溫

按魏書趙逸傳逸兄溫字思恭博學有高名姚泓天水太守劉裕滅泓遂沒於氏氏王楊盛盛子難當既有漢中以溫爲難當府司馬卒於仇池長子廣夏中書博士

趙逸

按魏書趙逸傳逸字思羣天水人也十世祖融漢光祿大夫父昌石勒黃門郎逸仕姚興歷中書侍郎爲興將齊難軍司征赫連屈丐難敗爲屈丐所擄拜著作郎久之拜寧朔將軍赤城鎮將綏和荒服十有餘年百姓安之所著述詩賦銘頌五十餘篇

趙柔

按魏書趙柔傳柔字元順金城人也少以德行才學知名河右世祖平涼州內徙京師高宗踐阼拜爲著作郎後出爲河內太守甚著仁惠

趙黑

按魏書趙黑傳黑字文靜初名海本涼州隸戶自云其先河內溫人也五世祖述晉末爲平遠將軍因居酒泉安彌縣海生而涼州平沒入爲閹人因改名爲黑有容貌恭謹小心世祖使進膳出入承

奉初無過行遷侍御典監藏拜安遠將軍賜爵睢陽侯轉選部尚書進爵河內公是時尚書李訢有寵於顯祖與黑有隙訢竟列黑爲監藏時多所截沒先是法禁寬緩百司所典與官並食故多所損折遂黜爲門士踰年遷入爲侍御散騎常侍侍中尚書左僕射出爲定州刺史進爵爲王太和六年薨諡曰康

趙琰

按魏書趙琰傳琰字叔起天水人父溫爲楊難當司馬初苻氏亂琰爲乳母攜奔壽春年十四乃歸孝心色養飪熟之節必親調之初爲兗州司馬轉團城鎮副將還京爲淮南王他府長史卒

趙令安

按魏書石文德傳天水白石縣人趙令安四世同居行著州里詔擢榜門閭

趙默

按魏書趙柔傳柔子默字冲明武威太守

趙熾

按魏書趙黑傳黑養族弟趙奴子熾爲後熾字貴樂初爲中散後官至揚州安南府長史神龜中卒長子揆字景則官至樂陵太守揆弟儁之字仲彥爲給事中轉謁者僕射卒

趙煦

按魏書趙琰傳琰子煦字賓育好音律以善歌聞於世位秦州刺史

趙修

按魏書趙修傳修字景業趙郡房子人父惠安後名謚陽武令修本給事東宮爲白衣左右頗有膂力世宗踐阼仍充禁侍愛遇日隆歷員外通直散騎常侍鎮東將軍光祿卿每受除設宴世宗親幸其宅諸王公卿士百寮悉從修之葬父也百寮自王公以下無不弔祭酒犢祭奠之具填塞門街修道路嬉戲殆無感容或與賓客奸掠婦女從者囂沓喧譁詬詈無節莫不畏而惡之高肇甄琛等構成其罪詔鞭一百徙燉煌爲兵行八十里死

趙邕

按魏書趙邕傳邕字令和自云南陽人司空李冲之貴寵也邕以少年端謹出入其家高祖太和中

至殿中監世宗卽位猶居本任趙修結爲宗援稍遷至殿中將軍邕父怡太和中歷郢州刺史停家
久之以邕寵召拜太常少卿出除荊州刺史遷光祿大夫卒世宗每出入郊廟修恆陪乘而邕執轡
同載時人號爲二趙世宗崩邕兼給事黃門俄轉太府卿出除平北將軍幽州刺史在州貪縱孝昌
初卒

趙翼

按魏書趙逸傳逸伯父遷遷元孫翼初爲平昌太守有治稱入歷軍校加鎮遠將軍長史爲領軍元
父所知遷光祿大夫卒

趙超宗

按魏書趙逸傳逸伯父遷遷元孫翼翼從子超宗有將略太和末爲豫州平南府長史帶汝南太守
賜爵尋陽伯賂太傅北海王詳詳言之於世宗除持節征鹵將軍岐州刺史徙河東太守卒官謚曰
成伯

趙令勝

按魏書趙逸傳超宗弟令勝疎狂有膂力歷河北恆農二郡太守並坐貪暴爲御史所彈遇赦免神龜末自後將軍太中大夫出爲恆農太守卒官

趙遐

按魏書趙逸傳翼從子遐初爲軍主從高祖征南陽以功封牟平縣開國子後督巴東諸軍事以輔國將軍出爲滎陽太守時蕭衍將馬仙琕率衆攻圍朐城遐進救坐失利免官延昌中起爲光祿大夫使持節假前將軍防捍西荆又爲別將隸蕭寶夤東征淮堰熙平初出爲平西將軍汾州刺史卒諡曰襄子子獻襲爵

趙叔隆

按魏書趙逸傳翼從子叔隆步兵校尉以貨自通拜冠軍將軍中散大夫尋遷左軍將軍太中大夫賂司空劉騰出爲中山內史在郡無德政專以貨賄爲事時論賤之

趙穆

按魏書趙逸傳翼從子穆善書記有刀筆之用爲汾州平西府司馬翼臨亡以穆託領軍元乂以穆

爲汝南內史

趙懿

按魏書趙逸傳翼子超宗超宗子懿歷員外常侍尚書郎

趙子素

按魏書趙逸傳翼從子遐遐子子素司空長流參軍

趙拔扈

按萬姓統譜拔扈新城人兄震動富於財爲太守樊文茂所殺拔扈走免亡命至杜樹咒曰文茂殺兄今欲報之若事克斫樹處便生不克卽死三宿而樹生遂聚衆至成都殺文茂而還

北齊 趙起

按北齊書趙起傳起字興洛廣平人也父達幽州錄事參軍起性沈謹有幹用高祖以爲段榮典籤除奉車都尉天平中徵爲相府騎曹累加中散大夫世宗嗣事出爲建州刺史累遷侍中居腹心之寄與二張相亞出爲西兗州刺史河清二年徵還天統初轉太常卿武平中卒官

趙彥深

按北齊書趙彥深傳彥深自云南陽宛人漢太傅熹之後高祖父難爲清河太守有惠政遂家焉清河後改爲平原故爲平原人也本名隱避齊廟諱故以字行父奉伯仕魏位中書舍人彥深幼孤貧事母甚孝初爲尙書令司馬子如賤客用爲尙書令史子如言於神武徵補大丞相功曹叅軍及神武崩文襄慮河南有變乃委彥深後事轉大行臺都官郎中封安國縣伯文宣嗣位進爵爲侯天保初累遷祕書監轉大司農出爲東南道行臺尙書徐州刺史爲政尙恩信爲吏人所懷徵爲侍中河清元年進爵安樂公累遷尙書左僕射尙書令爲特進封宜陽王武平二年拜司空七年薨有七子仲將知名仲將沈敏有父風學涉羣書善草隸位給事黃門侍郎散騎常侍隋開皇中位吏部郎終於安州刺史

趙猛

按北齊書趙猛傳猛太安狄那人姊爲文穆皇帝繼室生趙郡公琛猛性方直頗有器幹高祖舉義遷南營州刺史卒

趙輔和

按北齊書趙輔和傳輔和清都人少以明易善筮爲館客太寧武平中筮後宮誕男女及時日多中遂授通直常侍

趙深

按萬姓統譜深字德深武威人累遷侍中將軍源州大中正武平末徐州行臺左僕射徐州刺史

北周 趙善

按周書趙善傳善字僧慶楚國公貴之從祖兄也祖國魏洛州刺史父更安樂太守善沈毅有遠量永安初爾朱天光辟爲主簿普泰初拜驃騎將軍除持節東雍州諸軍事天光東拒齊神武於寒令陵善又以長史從及天光敗見殺賀拔岳復以爲長史岳爲侯莫陳悅所害善共諸將翊戴太祖魏孝武西遷除都官尙書封襄城伯頃之爲北道行臺遷車騎大將軍尙書右僕射進爵爲公大統三年轉左僕射善性溫恭有器局雖位居端右而逾自謙退九年從戰邙山爲敵所獲遂卒於東魏諡曰敬子度字幼濟車騎大將軍儀同三司度弟絢字會續驃騎大將軍開府儀同三司浙資二州刺

史

趙貴

按周書趙貴傳貴字元貴天水南安人也曾祖達魏庫部尙書祖仁以良家子鎮武川因家焉貴少
有節槩魏孝昌中爾朱榮以爲別將從討元顥授伏波將軍從賀拔岳平關中賜爵魏平縣伯累遷
鎮北將軍及岳爲侯莫陳悅所害將吏奔散莫有收者貴詣悅詐降悅信之因請收葬岳言辭慷慨
悅壯而許之貴乃收岳屍還與寇洛等糾合其衆奔平涼共圖拒悅首議迎太祖太祖至以爲大都
督領府司馬悅平以本將軍持節行秦州事當州大都督爲政清靜民吏懷之以預立魏文帝勳進
爵爲公拜侍中除雍州刺史六官建以貴爲太保孝閔帝踐阼遷太傅進封楚國公晉公護攝政貴
自以元勳佐命每懷怏怏謀殺護尋爲宇文盛所告被誅

趙剛

按周書趙剛傳剛字僧慶河南洛陽人也曾祖蔚魏并州刺史祖寧高平太守太平中除寧遠將軍
剛起家奉朝請累遷鎮東將軍魏孝武與齊神武構隙剛密奉旨召馮景昭率兵赴闕未及發而孝

武西遷侯景逼穰城東荊州人楊祖歡起兵應景景昭戰敗剛遂沒於蠻後自贖免乃見東魏東荊州刺史李魔憐勸令歸關西魔憐乃使剛入朝封陽邑縣子論功進爵臨汝縣伯除潁川郡守從復弘農進拜大都督轉陳留郡守除尚書金部郎中別破侯景前驅於南陸除營州刺史進爵爲公入爲光祿卿孝閔帝踐祚出爲利州總管遇疾卒於路諡曰成子元卿嗣

趙文表

按周書趙文表傳文表其先天水西人也後徙居南鄭累世爲二千石父江歷官東巴州刺史文表少而修謹便弓馬起家爲太祖親信魏恭帝元年征山南以功授都督復從宇文貴鎮蜀行昌城郡事加中軍將軍保定元年轉大都督從宇文貴使突厥迎皇后別封伯陽縣伯天和三年除梁州總管府長史大象中拜吳州總管時開府于顓爲吳州刺史懼文表圖己謀欲先之乃稱疾不出文表往問之顓遂手刃文表隋文以諸方未定恐顓爲變遂授顓吳州總管後知文表無異志聽其子仁

海襲爵

趙肅

按周書趙肅傳肅字慶雍河南洛陽人也世居河西曾祖武始歸於魏祖興中書博士父申侯後軍府主簿肅早有操行知名於時魏正光五年酈元爲河南尹辟肅爲主簿永安初授廷尉天平二年轉監後以母憂去職起爲廷尉正遷左將軍東魏天平初除新安郡守秩滿還洛大統三年獨孤信東討肅率宗人爲鄉導授司州治中轉別駕監督糧儲軍用不匱九年行華山郡事十三年除廷尉少卿封清河縣子十六年除廷尉卿肅久在理官執心平允廉慎自居不營產業十七年進位車騎大將軍儀同三司散騎常侍賜姓乙弗氏感心疾去職卒於家子正禮齊王憲府屬大都督新安郡守

趙昶

按周書趙昶傳昶字長舒天水南安人曾祖襄仕魏至中山郡守因家於代祖泓廣武令父琛上谷郡守昶少有志節以材力聞孝昌中起家拜都督鎮小平津魏北中郎將高千甚敬重之千牧兖州以昶行臨渙北梁二郡事大統初擢爲相府典籤氏梁道顯叛太祖遣昶慰諭之道顯卽款附秦州刺史魏光因徙其豪帥四十餘人并部落於華州太祖卽以昶爲都督領之封章武縣伯十五年拜

安夷郡守進撫軍將軍又拜武州刺史世宗初進爵長道郡公賜姓宇文氏二年徵拜賓部中大夫行吏部尋以疾卒

趙文深

按周書趙文深傳文深字德本南陽宛人父遐以醫術進仕魏爲尙藥典御文深少學楷隸年十一獻書於魏帝立義歸朝除大丞相府法曹叅軍大統十年追論立義功封白石縣男遷縣伯下大夫天和元年除趙興郡守以疾卒

隋 趙熨

按隋書趙熨傳熨字賢通天水西人也祖超宗魏河東太守父仲懿尙書左丞熨少孤養母至孝略涉書史周太祖引爲相府叅軍事累轉中書侍郎閔帝受禪遷陝州刺史時周人於江南岸置安蜀城以禦陳陳將吳明徹屢爲寇熨患勒兵禦之前後十六戰每挫其鋒以功授開府儀同三司遷荊州總管長史入爲民部中大夫除益州總管長史未幾入爲天官司會累遷御正上大夫高祖爲丞相遷大宗伯及踐阼熨授璽紱進位大將軍賜爵金城郡公出爲陝州刺史俄轉冀州刺史甚有威